



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu : Fevereiru 2012

Edisaun : 03 Marsu 2012

**Kontraversiu entre juíz Tribunál Distrital Baucau konabá “Akordaun
Tribunál Rekursu Nú. 80/CO/2011/TR”**

Iha loron 13 Fevereiru 2012 Tribunál Distritál Baucau hala’ó julgamentu ba kazu krime maus tratus ba kónjuje ho númeru prosesu 72/Crm.C/2011/TDB. Kazu ne’e involve arguidu ho inisiál JMX hasoru nia kónjuje ho inisiál PX. Kazu refere akontese iha loron 02 Marsu 2011, iha aldeia Lebenei, Suco Letemumo, Sub Distritu Quelequai, Distritu Baucau.

Prosesu julgamentu ba kazu refere prejide husi juíz kolektivu ne’ebé kompostu husi Dra. Ângela Faria Belo, Dr. Afonso Carmona no Dr. José Gonçalves, husi Ministériu Públiku representa husi Dr. Aderito Tilman no arguidu hetan akompañamentu husi Dr. Marçal Ximenes Guterres, Advogadu Privadu husi eskritoriu ECM.

Bázeia ba observasaun JSMP nian durante julgamentu, iha kontraversiu (*perbedaan pendapat*) entre juíz Dra. Angela F. Belo ho Dr. Afonso Carmona. Juíz Afonso Carmona, wainhira hetan oportunidade atu husu deklarasaun ba vítima, juíz refere rejeita atu husu deklarasaun ba vítima tanbá tuir nia interpretasaun antes husi tribunál ba deklarasaun husi vítima tenki fó oportunidade ba vítima atu hili hodi fó nia deklarasaun ka la’é bázeia ba artigu 125 alinea 1 letra a no b Kódigu Prosesu Penál (KPP).

Iha parte seluk Dra. Angela haktuir katak desizaun Tribunál Rekursu ho númeru 80/CO/2011/TR sai hanesan jurisprudénsia atu aplika ba kazu ne’ebé mai ho natureza violénsia doméstika. Katak vítima halo juramentu no iha obrigasaun atu ko’alia ho verdade, sé la’é, bele hetan responsabilidade kriminál.

Antes ne’e, iha loron 5 Outubru 2011, Tribunál Rekursu hatun Akordaun atu hatan ba rekursu ne’ebé hato’o husi Ministeriu Públiku ne’ebé la konkorda ho Tribunál Distrital Dili relasiona ho aplikasaun artigu 125 Kódigu Prosesu Penál.

Diretór ezekutivu JSMP Luis de Oliveira Sampaio haktuir katak *JSMP respeita teb-tebes independénsia papél juíz nian iha kualker autus prosesuál sira, maibé JSMP enkoraza juíz sira atu sensitívél ho realidade sosiál sira konabá kazu krime ne’ebé involve natureza violénsia doméstika.*

Juíz sira iha nia kompetensia no kbit rasik atu avalia no halo desizaun konabá kazu partikular ruma bázeia faktu no lei aplikavel, maibé JSMP hanoin katak kazu violénsia doméstika mai ho sirkunstansia no natureza ne'ebé komplexu. Tanbá ne'e aprosimasaun ba nia rezolusaun legal-formál mós tenke konsidera sirkunstánsia komplexu husi kazu ne'e no tenke ho aprosimasaun ne'ebé espesífiku..

Durante monitorizasaun JSMP nian, hatudu katak iha diferensia entre juíz ida ba juíz seluk relasiona ho akordaun ne'ebé Tribunál Rekursu hasai atu enkoraza vítima ba kazu violénsia doméstika sira ko'alia konabá faktu krime sira ne'ebé involve sira nia kónjuje hanesan arguidu.

JSMP hanoin katak persiza iha uniformiza kestaun legál sira ne'ebé hamósu konflitus iha Kódigu Prosesu Penál, atraves husi intervesaun husi Tribunál Rekursu hanesan Tribunál Superior iha Timór Lésté. Ne'e atu evita efeitu negativu ba ema sira ne'ebé buka justisa no atu asegura katak tribunál nu'udar sentru ba justisa, la'os fatin atu hametin fali injustisa tanbá deit ita kexi-an metin ho maneira aprosimasaun legal ne'ebé legalistiku.

Tuir JSMP nia hanoin katak **Akordaun Tribunál Rekursu Nú. 80/CO/2011/TR** nu'udar solusaun ida ba artigu 125 Kódigu Prosesu Penál ne'ebé durante ne'e hamosu konfuzsaun no produz implikasaun injusta ba vítima violénsia doméstika sira.

JSMP deskobre katak tuir loloos iha ona solusaun legál ba kestaun kontraversiu ne'e, liu-liu bele hare iha artigu 12 junta artigu 321 Kódigu Prosesu Penál (KPP). Tuir mai artigu 12.1 (c) *Supremu Tribunál ba Justisa nia plenáriu, iha kompetensia kiminál atu; uniformiza jurisprudénsia, tuir artigu 321 artigu sira seluk konabá jurisprudénsia nian.*

Mesmu nune'é, artigu 322 (3) KPP mós define katak rekursu atu fiksa jurisprudénsia vinkula tribunál hot-hotu iha Timór Lésté kuandu públika ona iha Journál da Repúblika.

Embora diferensia hirak ne'e, JSMP kontinua enkoraza no ejize autóridade judisiáriu sira atu maneija-an hodi haree kestaun ne'e ho sentidu ne'ebé realistiku no liu-liu atu la produz efeitu injusta no kontra-produtiva konabá funsaun no papél tribunál atu garante no asegura justisa tuir lei haruka.

Relasiona ho diferensia no kontraversiu ne'e, JSMP rekomenda ba Tribunál Rekursu atu públika Akordaun Tribunál Rekursu Nú.80/CO/2011/TR iha Journál da Repúblika tuir termu Artigu 322 (3) KPP atu asegura katak Akordaun refere bele produz implikasaun pozitivu ba vítima violénsia doméstika sira.

Atu hatene informasaun Kle'an favor kontaktu direitamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Landline: 3323883